

Mer glaabts ja net
awwer mit em Schambes iss alles widder in Ordnung.

Zwar hawwe alle
die wo en gekennt hadde
immer widder gesaacht:
Der Kerle werd scho widder
awwer geglaabt hats halt kaaner.

Also, ich geh vorch Woch
schnell nochemal a Schöppche trinke
am Eck vom Dalles
da wo frieher des 'Sport-Eck'
unn nachher des 'Schweinche Dick' drin war
da saacht der dicke Günther zu mir
Stell dir mal vor
wer bis ewe hier war
Ei, was weeß ich, saach ich
Da kommste nie druff
saacht de dicke Günther:
De Rumba Schmidt
Nee saach ich
doch saacht er
23 Schöppcher un 9 Korze
von heut morje um elf
bis ewe
un jetzt hawwe mer halb sibbe
Da bisde platt
Ja, saach ich
unn hasten ned emal gefraacht
warum der damals fort iss.

Nee sacht er
awwer des hat der von selber erzählt
und waaste, wer im Schlepptau war:
de Schambes Gehrlein
Geh fort, saach ich
doch, sacht de dicke Günther
die alt Korona iss widder da
und de Rumba hat gleich aagefange
zu rezidiern:

"Ich kam von meiner Herrin Haus
und wandelt in Wahnsinn und Mitternachtgraus
Und wie ich am Kirchhof vorübergehn will
Da winken die Gräber ernst und still - Heine"

Ich wees ja net, ob sie den Rumba kenne
und den Schambes.
Also die warn ja frieher
wie en Arsch un eine Seel
obwohl de Rumba ja immer e klaa bissje schlauer war
als de Schambes, weil er soll ja sogar en
Professor als Onkel hawwe
der wo in Thüringen lebt
jedenfalls warn de Rumba un de Schambes
schon immer zusamme gewese
schon in de Schul un dann beim Militär
beim Fußball unn jed Nacht bei Bienche
uffm Dalles
da hawwe die gesesse un erzählt
wenn kaaner dabei war sich selbst
und wenn annere sich dezu gesetzt hawwe
dann gings erst richtich los
jed Nacht - bis de Rumba fortgemacht iss.

Da war de Schambes wie verännert
de Vadder war ja Portefeuller
un de Schambes sollt ja aach Babscher werrn
awwer von der Tante Marieche aus hat er ja im
Lewensmittellaade vom Feinkost Lenz
arbeide solle un des ganze Zeuch ausfahrn
mit em Fahrrad.
Sogar e Vespa vom Rosenberger
hätt er krische solle, es Marieche hat en sogar
im Vespa Club aagemeld
awwer de Schambes wollt net.

Un als dann de Rumba fort war,
da hat der nur noch am Maa gesesse
uff dere anne Bank bei de Worzelfresser
und hat uffs Wasser geguckt
un nachts, da hat er geschellt üwwerall
nachts um halb drei
unn wenn jemand uffgemacht hat
da hat er sei Kapp gelüftet
un hat gesaacht
je nachdem

"Monsinjor oder Madmamsell
Sie entschudiche bidde
awwer hawwe sie vielleicht mein Freund
de Rumba Schmidt gesehe"

Die meisste Dürn sin ja gleich widder zugeknallt worn
awwer machmal hawwe se ihm aach e klaa Trinkgeld gewwe
Dann hat er immer gesaacht
"De St. Pankratius solls eich lohne
wie dem Vater auch dem Sohne"
Da konnt mer nix mache
beim Schambes
des hett sogar der Pfarrer geseecht
da wär Hoppe un Malz verloren
weil des sich bei dem schon im Körper abgesetzt hätt.

Un eimal hat der Pfarrer gesaacht
hätt de Schambes sogar bei einer Kindstauf gestört
weil er zu de Mutter des Täuflings gesaacht hätt
bevor die in die Kirch reigange wär
"Mir dünkt der Knabe hatt alle schlechten Eigenschaften vom Vater..."
un als die ihm eins wamse wollt
wärer stifte gange
awwer net ohne noch nachzurufe
"...weil ihr eure alle noch habt."

Ei, der hatt se doch net all
hawwe die Leid gesacht
un dann isser tatsächlich
fortkomme
nach Hadamar
des hat mir sehr leid gedan damals
un korz denach hawwe se sogar
das Wasserhäusje vom Bienche abgerisse
so dass, selbst wo die zwaa jetzt widder emol
do sinn, nix mehr so wie frieher wär.

Also den Schambes hab ich mir genau betracht
als er widder hem gekomme iss
ob der Schade genomme hat in Hadamar.
Still iss er geworn
des iss mir gleich uffgefalle
awwer aach wenn mer sacht
dass der jetzt vom Geld seiner Schwester lewe wärd
die hat so e klaa Schneidergeschäft
in de Stadt
gleich neberm Café Hebeis
also aach wenn mer sacht
dass der selber nix mehr uff die Reih kriecht
iss des doch en ganz noble Mensch
der die ganze Leid frei hält

Schenkt jedem e Blimmche
weil: "Es könnte Lewe rette" saacht er
so wies frieher uff de Telefonzelle
gestanne hat
als die noch gelb woarn
un in die Telefonzelle geht de Schambes aach enei
un ruft wildfremde Leid o und saacht
"Ich wünsche Euch zum Wiegenfeste
stets immer nur das Allerbeste"
und lecht wieder uff
vor allem awwer dene Kinner
gibt er immer was Siesses
ohne Hinnergedanke
ganz so wie de heilige Franziskus
un aach de Ente gibt er was ab
hält alle frei
mit trocke Brot und Bretscher
die er sich vom Bäcker holt
"Bevor ihr es zu Mehl machts klein
gebts lieber doch den Entelein"
iss sein Spruch
un wenn der rieht
da komme se all ausm Maa gelaafe
die Ente.

Jetzt iss ja vor korzem saa Schwester gestorbe
die Schneiders Ida
die net nur so geheesse hät
sonnern ja aach des Schneidereilädche gehabt hat
und seit dem saß er immer im Café Hebeis erum
unn guckt die Wänd o - jeden Taach
mer macht sich da als Außenstehender kaan Begriff devo
des sinn ja meist bessere Leid
die wo im Café Hebeis verkehre
unn bevor die rausgeganse sinn
sinn se all noch emol zum Schambes an de Tisch gegange
unn hawwe ihm a bissi was hiegelecht
en Zehner oder aach emal en Fufzicher
nie Scheine, nur Klaageld
un immer hat er Danke gesacht
un debei aus em Fenster geguckt
als wenn er sich geschämt hätt
da hat ahm richtich des Herz geblut
Son große Kerl
der iss ja immerhin iwwer ans neunzig
und für immer von alle Geister verlosse.

Und de dicke Günter het gesacht
wahrscheinlich desdeweeche wär de Rumba aach widderkemme
Ach saach ich, was het denn der Rumba erzählt
wo er geweese wär
Ja sacht de dicke Günter, er hat behauptet
dass er in Lettland an de Oper geweese wär
erst als Programmverkäufer un dann als Bariton im Chor
Awwer der kann doch gar kein Lettisch heb ich gesaacht
Ja er hätt halt als einzischer auf Deutsch singe dürfe
sozusaache simultan
unn in de Pause hätt er zusätzlch noch die Programme verkaaft
unn selbst dadebei hätt er als noch gesunge
Awwer de Rumba kann doch gar net singe saach ich
Er hät halt bei so aner russich Gräfin
im Schnellkurs des Opernsinge beigebracht bekomme
und dafür hätt er ihr beigebracht in de höchste Töne zu singe
"Awwer en Chevallier genießt und schweigt"
hat er dann glei gesaacht.

Was war denn dass für e Oper fraach ich de dicke Günther
Des waas ich aach net genau saacht der
er hat immer nur zum Schambes gesaacht:

"Jetzt ist die Zeit, hier ist der Ort
an dem meine Erfüllung wohnt
ich weiß es, was ich sonst nur ahnte
was ich ersehnt wird heut belohnt
Agnus Dei, qui tollis peccata mundi!".

Also was dess für e Oper gewese sei soll
saacht der dicke Günter
ich waas es net
awwer Kost un Logis wär in Lettland umsonst gewese
un er hätt jeeden Taach Fisch esse könne
soviel wie er gewollt hätt
unn eimal wä er sogar aus Versehe im Kostüm haam gange
"Jetzt ist die Zeit, hier ist der Ort
an dem meine Erfüllung wohnt".

Was des für e Oper gewese sei soll
saach ich und hab debei mit em Kopp geschittelt
Also war der gar net in Amsterdam
oder bei de Presbyter
Ach was, saacht der dicke Günther
in Wirklichkeit war der die ganz Zeit
bei seim Onkel im Odenwald
un hat bei Schwinnes uffm Hof geholfe

awwer er streitet des ab
un erzählt er wär eines Tages mit em Schiff von
Lettland nach Irland gefahrn
des wär ja heut nur en Katzesprung
und hätt dort awens an der irisch Küst gestanne
und hätt gesunge
"Wenn bei Capri die...bleiche Sichel des Mondes blinkt,
zieh'n die Fischer...im weiten Bogen die Netze aus"
Er hätts für die Fisch gesunge
damit die en große Booche um die Netze mache
wenn se mol nach Capri kemme dääd.

Ja un wovon hat der in Irland gelebt?
Na er hätt in Irland noch
die restliche Programme verkaafe kenne
die er von de Oper in Lettland iwwerich gehabt hätt
Alles erstunke un erlooche nadierlich
Un eines Awends wär er beim Fischkonzertsinge
ins Meer gefalle un erst im Felsemeer widder uffgewacht
un dann wär aach schon sein Onkel kämme und hätt gesaacht
Komm mit Bub, du siehst ja forchtbar aus
un dann hätt er noch e bissi beim Onkel
uffm Schwinnehof ausgeholfe
un dann wär er gleich nach Berjel zurickkemme
nach 11 Joar und 23 Taach.

Ja un jetzt?
Waß ich aach net
saacht de dicke Günther
De Rumba hat jedenfalls gesaacht
Vielleicht geh ich als Aushilf
widder in die Botenmeisterei ins Rathaus
oder an die Universität nach Jena
da wär sein annere Onkel nämlich immer noch Professor
Dodal Plemplem

Awwer in dem Moment
seecht de dicke Günther
wär de Schambes plötzlich uffgesprunge
un uff de Tisch gehippt und hätt gesaacht
Wenn Du noch een Mal abmächst
dann schieß ich mir e Kuchel durch de Bauchnawwel
dass in Seckbach die Antennedräht wackele.

Da wusste mer wenichsdens
saacht de dicke Günther
dass mit dem alles widder in Ordnung iss.